

EDITORIAL

Batukan ang Task Force Philippines sa imperyalistang US

Kinahanglan nga kusganong makmakon ug batukan ang gitukod nga Task Force Philippines sa imperyalistang US nga pagagamiton niini alang sa dugang nga interbensyong militar sa nasud. Sa pagtukod sa Task Force Philippines, labawng dayag nga gikontrol sa US ang Armed Forces of the Philippines (AFP) ug uban pang pwersa sa seguridad sa neokolonyal nga estado aron magsilbi sa heyopulitikal nga interes sa US sa Asia.

Ang Task Force Philippines usa ka bag-ong yunit militar sa US nga nakabase sa Pilipinas. Ang tumong niini mao ang pagtakda sa direksyon, plano, ug operasyon sa AFP sa "depensang panggawas" gikan sa South China Sea hangtud sa Luzon Strait, batok sa giingong "pugsanon ug agresibo" nga lihok sa China sa kadagatan.

Dakung kabuang ang deklaradong tumong niini nga "pagpalig-on sa kooperasyon tali sa US ug Pilipinas." Kataw-anan nga giangkong mismo sa hepe sa AFP nga wala siya'y nahibal-an nga detalye mahitungod niining planong task force sa US. Ang iyang nahibal-an lamang mao nga kini gibase sa konsepto ug operasyon sa Task Force Ayungin nga gitukod sa US sa miaging tuig.

Gitukod ang naunang task force kaniadtong 2024 ug gilangkuban sa mga upisyal militar sa US. Kini ang nagplano sa mga operasyong "re-supply" sa AFP sa barkong BRP Sierra Madre nga nahimutang sa Ayungin Shoal. Gipadala sa US ang mga himang militar ug armas niini,

ug gisuportahan sa ilang sarbeylans sa kahanginan ug kawanangan (satellite). Sa laktud, ang mga "re-supply mission" sa AFP mga operasyon sa kadagatan nga direktang mando ug kontrol sa US.

Ang pagtukod sa Task Force Philippines mao ang pinakabag-ong pakana sa imperyalistang US ug usa ka klarong timailhan sa mas taas nga ang-ang sa interbensyon. Kini nagsilbi sa gambalay sa Indo-Pacific Strategy sa US aron palibutan ang imperyalistang karibal niini nga China, ug pugngan ang nagkadakung gahum niini sa militar ug ekonomiya.

Daghan nang tuig nga ginaga-

mit ug ginasugnuran sa US ang panagbangi sa kadagatan tali sa Pilipinas ug China aron hatagag rason ang paggamit sa Mutual Defense Treaty ug uban pang mga dili patas nga kasabutang militar aron palig-onon ang presensya sa mga pwersang militar niini sa Pilipinas. Gitukod niini ang labing menos siyam ka base militar sa US nga giila ubos sa Enhanced Defense Cooperation Agreement (EDCA).

Daghan pa ang wala giangkong base ug pasilidad sa US sa nagkalain-lain bahin sa nasud, lakip ang gitukod nga pasilidad sa AFP sa Mavulis Island sa Batanes aron magamit sa US. Adunay presensya



usab ang militar sa US sa mga pasilidad sa Ilocos Norte, Aurora, Quezon, Mindoro, Panay, ug nagkalain-lain bahin sa Palawan. Kini nga mga pasilidad gidumalahan sa mga upisyal ug sundalong Amerikano o gipahimutangan og mga armas sama sa Typhon missile system ug uban pang magun-ubong mga armas. Plano usab sa US nga tukuron sa nasud ang mga pabrika sa bala, drone, ug uban pang armas. Dugang pa, adunay plano ang US nga magtukod og refueling depot sa lapad nga kadagatan sa Davao Gulf.

Permanente usab ang presensya sa mga barkong iggugubat sa US sa kadagatan sa Pilipinas, lakip ang mga higanten aircraft carrier nga nagsakay og liboan ka sundalong Amerikano. Libre silang nagalawig ug nagadunggo sa bisan asang bahin sa Pilipinas. Gigamit kini sa sunud-sunod ug patung-patong nga mga war games sa Pilipinas, nga pulos nakapokus sa senaryo sa pag-ulbo sa gubat batok sa China.

Lunod-patay nga itoy si Marcos sa iyang amo nga imperyalistang US. Labaw pa siyang nahimong itoy tungod sa desperasyong makuha ang suporta sa US, taliwala sa nagkakusog nga krisis sa pulitika tungod sa nabutyag nga dakung mga

kaso sa korapsyon ug nagpadayon nga lapad nga mga protesta batok sa iyang rehimen.

Sa bag-o lang nga miting sa ASEAN, si Marcos ang nagsilbing tigdala sa adyenda sa US, ug gipugos ang giingong "enhanced defense cooperation" sa mga nasud sa Southeast Asia batok sa "hulga ug agresyon" sa China. Napalaw si Marcos kay wala bisan usa nga misuporta sa iyang sugyot.

Subay sa mando sa US, sunud-sunod nga gisulod ni Marcos ang mga kasabutang "visiting forces" sa Japan ug Canada, mga nasud nga kaalyado sa militar sa US. Ang tumong niini mao ang pagtugot nga gamiton sa maong mga nasud ang teritoryo sa kadagatan ug kayutaan sa Pilipinas alang sa mga operasyong militar nga kaalyado sa US. Karon, gipasigarbo pa ni Marcos nga mopalit siya og mga himang iggugubat gikan sa US aron kunuhay makasukol og usa ka bulan ayha mangayo og tabang sa laing nasud.

Subay sa adyenda ni Marcos, ang nagkalain-lainng maka-US nga partido, organisasyon, institusyon, ug mga bahin sa masmidya naglihok aron suportahan ang nagkadakung presensya militar sa US sa Pilipinas, ubos sa tabil nga pagdependa sa

"West Philippine Sea." Kining tanan gipondohan sa imperyalismong US pinaagi sa mga institusyon sama sa National Endowment for Democracy ug midagayday sa mga grupo sama sa "INCITEgov." Niadtong 2023, naghatag ang guberno sa US og \$1.6 bilyon alang sa 5-tuig nga programa sa "propagandang kontra-China."

Ginapaypayan nila ang Sinopobia o ang pagdumot sa tanang may kalabutan sa China. Sama kang Marcos, gipahayag nila nga adunay hulga sa "pagpanakop" ug "agresyon" gikan sa China, apan hilum kung giunsa ang Pilipinas nagpabilang neokolonya sa imperyalismong US. Ginapagawas nila nga "maka-China" ang bisan kinsang mosupak sa mga interbensyong militar sa US sa Pilipinas.

Nagpakaaron-ingnon karon ang mga Duterte nga anti-US aron tabunan ang isyu sa korapsyon diin nalambigit ang ilang pamilya. Walay pulos kini nga postura. Dihang anaa siya sa poder, wala gibuhat si Rodrigo Duterte aron sirad-an ang mga EDCA site ug hingpit nga ibasura ang VFA ug uban pang kasabutang militar sa US. Gipabuhian niya ang sundalong Amerikano nga mipatay kang Jennifer Laude. Hilum karon ang mga Duterte sa plano sa US nga magtukod og refueling depot sa Davao Gulf.

Taliwala sa nagkakusog nga pagduso sa US sa pagpanghagit og gubat ug pag-among o paggamit sa Pilipinas batok sa China, daku ang panginahanglan nga magkahiusa ang katawhan aron molihok sa pag-supak ug pagbatok niini.

Kinahanglang pakusgon ang singgit sa katawhan aron bungka-gon ang tanang base militar sa US, tangtangon ang tanang misayl sa US sa mga sekretong lokasyon sa Pilipinas, ug papahawaon ang mga pwersang militar sa US sa nasud. Kinahanglan isumpay kini sa pakigbisog sa katawhan aron makalingkawas sa mga kuko sa imperyalistang mangdadagit, makab-ot ang kaugalingnan, ug matukod ang nasud nga gawasnon ug mauswagon. **AB**



Bol. LVI Ihap 21 | Nobyembre 7, 2025

Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles.

Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.

Unod

Editorial: Batukan ang Task Force Philippines sa imperyalistang US 1

Pagpakaitoy sa rehimeng Marcos sa US 3

Higanteng protesta kontra kurakot sa Nob. 30 4

Kadaut sa bagyo ug kahiwian sa Cebu 5

Mga protesta 5

Pakigbisog sa mga mamumuo 5

94th IB, giatake sa BHB 5

Gipakusog sa Kaguma ang iyang hanay 6

Sa mubong pagkasulti 7

Nagkagrabeng pagpanumpo sa rehimeng Trump 8

Makaluluoy nga kahimtang sa migranteng Pilipino 9

North Caloocan, gipailalum sa militarisasyon 9

Interbensyon sa NTF-Elcac sa mga unibersidad 10

Isla sa Leyte, gidaut sa militarisasyon 10

Paglapas sa katungod-tawo sa Panay ug Negros 10

Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas

 ang.bayan@cpp.ph

Itoy nga rehimeng Marcos Jr: Tigpaluyo sa imperyalistang adyenda sa US sa SEA

Niadtong Oktubre 31, gianunsyo ni Pete Hegseth, kalihim sa Department of War sa US (kanhing Department of Defense), ang pagtukod sa US sa “Task Force Philippines” atol sa pulong sa ASEAN Defense Ministers’ Meeting (ADMM)-Plus sa Malaysia. Ang *task force* gilangkuban og 60 ka elemento gikan sa US Pacific Fleet ug pangulohan sa usa ka heneral nga Amerikano. Kini pagpalapad sa mga operasyon sa US Task Force Ayungin nga nakabase sa Palawan ug karon nagdirihe sa pakigdutdut sa Pilipinas sa mga barkong Chinese sa mga giilugang isla ug bahura.

Gipahibalo ni Hegseth ang Task Force Philippines human wala nauyonan sa ASEAN ang iyang sugyot nga pagtukod og “shared maritime domain awareness program” aron isentro sa US ang mga datos-paniktik batok sa China. Wala midapig ang mga nasud sa sugyot bisan pa sa tanyag niyang abanteng teknolohiyang *drone* sama sa mga *unmanned* nga sakyanang pangkahanginan ug pangdagat isip baylo sa kooperasyon.

Usa na lamang ka “Indo-Pacific Chiefs of Defense Cooperation Council” ang gitukod ni Hegseth, kauban ang itoy niining si Gilbert Teodoro, ug mga kalihim sa depensa sa Australia ug Japan sa ilang miting sa Malaysia niadtong Nobyembre 1. Walay bag-o sa maong konseho tungod kay ang upat ka nasud aduna nay mga “kooperasyon” pinaagi sa *bilateral*, *trilateral*, ug *multilateral* nga mga kasabutang militar.

Tigwarawara sa imperyalistang adyenda

Sa wala pa ang anunsyo, nagpadayag og kabalaka ang mga sili-ngang nasud sa Pilipinas sa pamulong ni Ferdinand Marcos Jr sa ASEAN niadtong Oktubre 28 diin nana-wagan siya alang sa “enhanced defense cooperation” uban sa Japan ug US batok sa giingong “seryosong hulga sa agresyon sa China” sa rehiyon.

Gipahimangnoan sa *prime minister* sa Malaysia nga si Anwar Ibrahim nga “dili magpadala sa mga eksternal nga pwersa” aron masul-

bad ang internal nga mga panaglalilis. Matud ni Ibrahim, angay nga likayan ang pagpamugos ug kagubot alang sa istabilidad sa rehiyon. Giawhag niya ang mga nasud nga ipaagi sa dayalogo, kooperasyon, ug malinawong pamaagi ang pagsulbad sa mga isyu subay sa mga prinsipyo sa ASEAN. Nagpadayag usab og kabalaka ang Indonesia, Laos, ug Cambodia sa labaw pang pag-init sa tensyon sa kadagatan tungod sa agresibong pagpanghagit ni Marcos sa China.

Bag-o lang, gipanghinambog pa sa kumander sa AFP nga si Romeo Brawner ang kapabilidad sa Typhon Missile System nga “abton ang China.” Ang maong sistema sa misayl gibutang sa amihanang bahin sa Luzon, duul sa Taiwan. Mahimong isipon kini nga opensibang postura ug kabahin sa interbensyon sa US sa

internal nga mga isyu sa Taiwan ug China.

Base sa imperyalistang makinarya sa gubat

Ang Pilipinas, pinaagi sa lunodpatay nga tutang estado niini, ang bugtong nasud sa Southeast Asia nga nagtugot sa dinugay nga pagbase sa mga langyawng tropa ug ilang mga armas sa kayutaan ug kadagatan niini. Kini lamang usab ang adunay pormal nga mga kasabutang militar sa US sama sa Mutual Defense Treaty ug Enhanced Defense Cooperation Agreement sa rehiyon. Timaan sa hingpit nga pagkaitoy niini, gitukod sa AFP ang Strategic Command aron hugpungon ang lain-laing sanga niini aron mas mapadali ang dagan sa mando sa US.

Sa sunod nga mga bulan, dili na lang mga tropang Amerikano ang pagatugutan sa rehimeng Marcos nga magbase sa Pilipinas. Anaa na sa negosasyon ang pagtukod sa Japan ug Australia, mga mayor nga kaalyado sa US, sa ilang kaugalingong mga base ug bodega sa nasud. Dugang sa US, upat na ka nasud ang gitugutan nga magsulod-gawas og tropa, gamit, ug sakyanan subay sa gipirmahan nga mga *visiting forces agreement* (VFA).

Ang pinakabag-o niini mao ang VFA uban sa Canada nga gipirmahan niadtong Nobyembre 2.

Walay hunong ug nagpuli-hinay ang presensya sa mga langyawng tropa sa nasud pinaagi sa walay katapusang *war games*, *multilateral maritime exercise*, “pag-inambitay” sa kasinatian, ug mga operasyong sibil-militar. Gigamit nila bisan ang sunud-sunod nga mga katalagman nga nasinati sa mga Pilipino, sama sa linog ug lunop, aron himuong “normal” sa katawhan ang ilang presensya ug interbensyon sa internal nga mga isyu sa nasud.



Higanteng protesta sa katawhan batok sa korapsyon, giandam alang sa Nobyembre 30

Nakatakda nga ilunsad ang higanteng protesta sa katawhan batok sa korapsyon sa Luneta Park sa Manila ug uban pang bahin sa nasud sa Nobyembre 30. Manguna dinhi ang bag-ong gitukod nga Kilusang Bayan Kontra Kurakot (KBKK) nga mitumaw gikan sa protesta sa 100,000 ka indibidwal sa gitawag nga Baha sa Luneta niadtong Setyembre 21. Ipapana-wagan sa grupo: "Tanang nalambigit, kinahanglang manubag!"

Sumala sa KBKK, pinaagi lamang sa pagpanubag sa tanang nalambigit sa anomalya maundang ang sistematikong korapsyon nga naghasol sa katawhan. Lakip sa "tanang" si Presidente Marcos nga maoy naghimo ug nagaprub sa tinuig nga badyet nga puno sa anomalya, ug si Bise Presidente Duterte nga gipasinginlan sa pag-usik sa gatusang milyon nga *confidential and intelligence funds*.

Sa tibuok Nobyembre, matag semana ilunsad sa mga sakop sa KBKK ang Black Friday Protest, mga piket ug kalampagan sa mga komunidad, unibersidad, pabrika, merkado, ug bisan asa nga natigom ang katawhan. Manguna usab kini sa mga porum, dagkong mga tigom, ug pagladlad sa mga banderitas aron maabot ang mas daghang Pilipino.

Niadtong Oktubre, sunud-sunod ang mga protesta ug atibidad sa mga organisasyon ubos sa KBKK. Nagmartsa gikan sa Liwasang Bonifacio paingon sa Mendiola sa Manila ang liboan ka mag-uuma, kau-ban ang ubang demokratikong sektor niadtong Oktubre 21. Ang ilang panawagan mao ang tinuod nga re-porma sa yuta ug pagpanubag sa rehimeng Marcos sa kahiwian. Adunay mga protesta usab sa Cebu, Bacolod, Davao, ug Santiago City sa Isabela, ug sa mga prubinsya sa Southern Tagalog ug Panay. Gisupportahan sa mga migranteng Pilipino gikan sa US, Canada, Australia, United Kingdom, Japan, Hong Kong, ug South Korea ang mga mag-uuma pinaagi sa "global kalampagan."

Niadtong Oktubre 24, gipahigayon ang Black Friday Protest sa Bayan-NCR sa mga syudad sa Manila,

Quezon, Pasig, Taguig, ug Valenzuela. Adunay susamang aktibidad sa Laguna ug Albay. Gidag-sang usab sa mga myembro sa Kalikasan-PNE, People Surge, ug Kadamay ang compound sa Taguig City diin nag-upisina ang ICI.

Niadtong Oktubre 27, nagtapok sa San Juan City ang mga obispo, pari, ug pastor gikan sa nagkalain-laing denominasyon nga nakabase sa National Capital Region aron tukuron ang Church People Against Corruption. Sa sunod nga adlaw, nagprotesta ang mga balangay sa Gabriela sa Nasudnong Adlaw sa Protesta sa Kababayan-an.

Niadtong Oktubre 30, nagprotesta ang mga mamumuong panglawas sa Quezon City aron makmakon ang korapsyon, ug manawagan og dugang sweldo, pagbayad sa mga benepisyo, ug dugang empleyado sa mga ospital sa gubyrno. Nagprotesta usab ang mga estudyante sa UP-Tacloban ug University of Eastern Philippines sa Northern Samar.

Niadtong Oktubre 31, nagmartsa pag-usab ang mga grupo ubos sa Bayan paingon sa Mendiola sa Manila. Gipahigayon usab niadtong adlaw sa Concerned Artists of the Philippines ang #StopKorap Halloween Party nga may temang "Ghost Projects: The Exorcism!" sa Quezon City. Aduna usay Black Friday Protest sa Caloocan ug Pasay City, San Pablo City sa Laguna, ug sa Cagayan de Oro City.

Pangil sa pasismo

Atubangan sa nagkalapad nga kasuko sa katawhan, padayon ang pagsulay sa rehimeng Marcos nga sumpuon ug hadlukon ang kabatan-



onan. Niadtong Nobyembre 3, gianunsyo sa Philippine National Police-Criminal Investigation and Detection Group (PNP-CIDG) nga nagpasaka kini og mga kaso batok sa 97 ka wala nganling indibidwal nga may kalabutan sa protesta niadtong Setyembre 21 nga miresulta sa bangis nga pagpanumpo sa mga pulis.

Dugang kanila, upat ka lider-estudyante gikan sa University of the Philippines-Diliman, Polytechnic University of the Philippines, ug De La Salle-College of St. Benilde ang gipadalhan sa PNP-CIDG og *subpoena* aron ipailalum sa imbestigasyon. Mibalibad ang mga lider-kabatan-onan nga moatubang sa mga pulis. Usa ka protesta usab ang ilang gipahigayon niadtong Oktubre 27 sa hedkwarters sa PNP sa Quezon City aron batikuson ang mga *subpoena*.

Gawas niini, napulo sa 270 ka indibidwal nga gipangdakop niadtong Setyembre 21 ang girekomenta sa prosekyutor sa Manila nga pormal nga moatubang sa kasong *tumult and other disturbances of public order*. Samtang, gibasura ang mga reklamong ilegal nga asembleya ug *direct assault* nga gisang-at sa mga nadakpan tungod sa kakulang sa igong ebidensya.

Korapsyon ug pagkwari sa Cebu, nagresulta sa trahedya

MOKABAT NA SA 139 ang nataho nga namatay sa Cebu niadtong Nobyembre 7 tungod sa paspas nga pagbaha tungod sa walay puas nga pagkwari sa kabukiran sa isla, nga gipagrabe sa dakung bolyum sa ulan nga gidala sa Bagyong Tino. Labing daghan ang nataho nga namatay sa Liloan ug sa mga syudad sa Talisay, Mandaue, ug Cebu, mga lugar nga unta adunay mga imprastrukturang *flood control*, lakip ang mga proyektong gikontrata sa mga kumpanya sa mga Discaya. Ikaduha ang Cebu sa adunay pinakadaghan nga proyektong *flood control* sa nasud nga nagkantidad og ₱26 bilyon.

Nanawagan ang mga Cebuano og hustisya alang sa mga naapektuhan tungod sa kapalpak sa mga proyektong *flood control*, ug pagpanubag sa mga korap nga lokal ug nasudnong upisyal sa gubyrerno.



Piket batok sa taas nga singil sa tubig. Nagpiket ang Bayan-Panay sa upisina sa Metro Iloilo Water District sa Iloilo City niadtong Oktubre 20 aron makmakon ang gikatakhang pagtaas sa singil sa tubig. Magtaas og 26% ang Metro Pacific Iloilo Water ngadto sa ₱25.2 kada *cubic meter* sa Nobyembre ug mahimong ₱28.67 kada *cubic meter* sa Marso 2026, gikan sa kasamtangang ₱20 kada *cubic meter*.

NCIP sa Pampanga, gidagsang sa mga Ayta. Midangsang sa upisina sa NCIP Regional Office sa San Fernando, Pampanga niadtong Oktubre 23 ang mga katutubong Ayta ug ubang sektor. Nagpadayag sila og pagsupak sa mga proyektong nangawkaw sa ilang yutang kabilin sama sa mga operasyon sa kwari, mina, *golf course*, ug *solar farm*. Sa wala pa ang protesta, gitukod sa mga Ayta ang ilang organisasyon nga Mansaway ug ang Pamilalamu, kahugpungan sa mga katutubo ug simbahan.

Kabatan-onan sa Mindanao para sa Palestine. Naglunsad og aktibidad ang mga estudyante sa Mindanao State University-Iligan Institute of Technology sa Iligan City ug University of Science and Technology of Southern Philippines sa Cagayan de Oro City sa ulahing semana sa Oktubre isip pakighiusa sa katawhang Palestino. Gimakmak nila ang henosidyo sa Zionistang Israel ug imperyalistang US batok sa mga Palestino sa Gaza.

Pagsupak sa pribatisasyon sa merkado sa Baguio City. Milihok ang mga residente sa Baguio City niadtong Oktubre 26 aron supakon ang pribatisasyon o gitawag nilang "mallification" sa SM Prime Holdings ug lokal nga gubyrerno sa publikong merkado sa syudad. Naglunsad ang mga grupo og lain-laing aktibidad isip panawagan alang sa inklusibo ug nakasentro sa komunidad nga kalamboan sa syudad.



Pakigbisog sa mga mamumuo sa Wyeth Philippines. Subling nagprotesta ang mga mamumuo sa pagpanguna sa Wyeth Philippines Progressive Workers Union-DFA-KMU atubangan sa planta sa kumpanya sa Cabuyao City, Laguna niadtong Oktubre 24. Gikundena nila ang padayon nga pagdumili sa kapitalista nga tubagon ang ilang panawagan alang sa makatarunganong suhulan ug regularisasyon sa halos upat ka bulan nang negosasyon alang sa collective bargaining agreement (CBA).

Suhulan ug katungod, panawagang tahuron sa Kowloon. Nagpiket ang mga mamumuo sa Kowloon House West gawas sa restawran sa West Avenue, Quezon City sa pangulo sa Kowloon House West Chapter sa Glowhain-KMU niadtong Oktubre 24. Gikundena sa unyon ang giingon nilang dayag nga pagbalewala sa maneydsment sa katungod sa mga mamumuo ug paglapas sa ilang CBA. Sumala sa unyon, napakyas ang restawran sa pagpatuman sa mga probisyon sa CBA sama sa across-the-board nga pagtaas sa suhulan subay sa mando sa regional wage board ug sa hustong proseso sa mga kaso sa pagdisiplina. Wala usab kini naghatag og angayang benepisyo ug proteksyon.

Duha ka unyon sa UA&P, nangandam magwelga. Nagsumite og taho sa *strike vote* ang University of Asia and the Pacific (UA&P) Union of Faculty Members ug UA&P Union of Allied Employees sa National Conciliation and Mediation Board (NCMB) niadtong Oktubre 27. Kini ang tubag sa duha ka unyon sa pagdumili sa administrasyon sa unibersidad sa panawagan alang sa dugang sweldo, benepisyo, ug maayong kahimtang sa trabaho. Upat na ka bulan nga nakig-areglo ang mga unyon sa administrasyon sa lebel sa NCMB apan nagmagahi ug nagpabungol-bungol kini sa ilang panawagan.

94th IB, gi-atake sa BHB

NAGLUNSAD OG OPERASYONG haras ang Bagong Hukbong Bayan (BHB)-South Central Negros (Romeo Nanta Command) batok sa mga tropa sa 94th IB sa Sityo Cantupa, Barangay Buenavista, Himamaylan City, Negros Occidental niadtong Oktubre 27 sa gabii. Dili momenos sa duha ka mga berdugong sundalo ang naangol.

Misutoy pagdagan ang mga sundalo ug pipila ka segundo pa ayha makabalos og buto. Paturagas nga nangrakra ang 94th IB gamit ang ilang mga masinggan ug nagpabusikad og M203.

Samtang, nataho sa BHB-Southwest Negros (Armando Sumayang Jr Command) ang pagsurender sa pipila ka ahenteng intel sa 15th IB sa lungsod sa Cauayan sa Oktubre. Gidawat sa yunit ang pagsurrender sa mga ahente sa rason nga wala pa silay gibungang kadaut ug utang nga dugo sa rebolusyonaryong kalihukan ug sa katawhan.

Sa diwa sa kalihukang pagtul-id

Gipakusog sa Kaguma ang han-ay sa mga rebolusyonaryong magtutudlo

Mahukmanong gipatigbabawan sa Katipunan ng mga Gurong Makabayan (Kaguma) ang mga kahuyangan ug kasaypanan niini sa milabayng mga tuig, sa inspirasyon sa kalihukang pagtul-id sa rebolusyonaryong kalihukan. Pamatuod niini ang pagpahigayon sa rebolusyonaryong grupo sa mga magtutudlo sa ilang Ika-upat nga Nasudnong Kongreso niadtong Oktubre.

Nagtapok ang dili momenos sa 79 ka myembro sa mga balangay sa Kaguma gikan sa lain-laing rehiyon, akademikong institusyon, ug unibersidad sa sektor sa edukasyon alang sa kongreso. Nagkahiusa ang mga delegado sa temang “Asdang rebolusyonaryong kalihukang magtutudlo! Magtul-in! Magpalapad! Makigbisog! Magmadaugon! Determinadong iasdang ang demokrati-kong rebolusyon sa katawhan nga adunay sosyalistang perspektiba!”

Kapin duha ka dekada na ang milabay sukad sa ulahing kongreso sa grupo. Ang mga una niining kongreso gipahigayon niadtong 1985, 1987, ug 2003. Gitukod ang grupo niadtong Marso 28, 1971.

“Subling ipabarog ang Kaguma, mapangahasong magpalapad ug magpalig-on sa tibuok nasud. Subsub nga iasdang ang mga kumprehensibong katungdanan alang sa rebolusyon,” matud sa Nasudnong Kalihiman report niini sa pagsugod sa kongreso.

Sa maong tigum, gireport sa kalihiman ang pagsumada sa Kaguma sa kaugalingong organisasyon sa milabayng duha ka dekada. Gipakita niini ang mapainubsanong pagsaway sa kaugalingon sa pagbiya sa batakang prinsipyo sa rebolusyonaryong organisasyon ug sa mga pamaagi niini sa milabayng mga tuig.

Napinal ug nauyunan sa kongreso ang mahinungdanong mga dokumento sa Kaguma, lakip ang oryentasyon, batakang balaod, ug ang tu-



lo ka tuig nga taktikal nga plano niini. Gigambalay sa kongreso ang unum ka resolusyon nga mogiya sa padayon nga pag-uswag sa organisasyon.

Gipili usab sa kongreso ang bag-ong Nasudnong Konseho ug Nasudnong Komiteng Tigpatuman nga mao ang mangulo sa organisasyon sa tibuok nasud. Si Guia Umili napili isip tsirman ug tigpamaba sa Kaguma.

Gitimbaya sa National Democratic Front of the Philippines ug sa Partido Komunista ng Pilipinas ang determinasyon ug kapursigido sa Kaguma sa pagpahigayon sa Ika-upat nga Nasudnong Kongreso niini.

“Naglaum kami nga niining kongreso makonsolida ninyo ang inyong han-ay, makakuha og mga leksyon gikan sa mga kasinatian, ug mas lig-on nga moabante sa pagtuman sa mga katungdanan sa pagpalig-on sa rebolusyonaryong han-ay sa mga magtutudlo,” matud ni Elias Dipasupil, kinatibuk-ang kalihim sa NDFP.

Sumala kang Marco Valbuena, nangulong upisyal sa impormasyon sa PKP, dili malimud nga makasaysayanon ang gilunsad nga kongreso, dili lamang tungod kay napahigayon kini human sa taas nga panahon, kundili tungod kay sigurado nga kini mao ang sinugdanan sa bag-ong panahon sa pag-uswag sa mas taas nga ang-ang sa rebolusyonaryong kalihukang magtutudlo.

Matod ni Valbuena, ang Kaguma nagsilbing sulo alang sa mga magtu-

tudlo nga naghatag og kahayag sa

dalan nga kinahanglan nilang baktason aron makab-ot ang ilang mga tinguha ug sa tibuok katawhan. “Sa inyong pagpaningkamot, gihatagan ninyo og inspirasyon ang mga magtutudlo aron motan-aw lapas sa kasamtangang mga kalisdanan, ug mosalmot sa pakigbisog sa mas lapad nga katawhan aron hingpit nga mabag-o ang kahimtang sa katilingban,” mensahe niya sa Kaguma.

Sa paghuman sa kongreso, dungan-dungan nga nanumpa pag-usab ang mga myembro ug mga bag-ong napili ng mangulo, gisundan sa panak-op nga pamahayag sa tsirman. Sa iyang pamulong, giila ug gipasidunggan ang mga martir sa sektor ug sa katawhan. “Silang naghalad ug nagbuhis sa tibuok kinabuhi alang sa rebolusyon. Pasidunggan nato ang mga kauban nato sa kabanikanhan, nga mipatuman sa taas nga matang sa pakigbisog,” matud niya.

Hagit ni Umili sa mga delegado: “Hinaot nga padayon nga molig-on ang panaglambigitay sa atong rebolusyonaryong teorya ug praktika; hinaot nga ang mga dokumento ug pagtuon dili mahimong nagpondong kahibalo nga natago lamang sa atong mga hunahuna kundili mahimong giya sa pagpalambo sa atong paglihok; ug ang atong paglihok iabante ngadto sa mas taas nga ang-ang sa atong rebolusyonaryong teorya.”

AB

PORK BARREL ni MARCOS

₱15.9 BILYON

confidential and intelligence funds
(2022-2025)

₱2.1 TRILYON

unprogrammed allocations
(2023-2025); kung asa ₱214.4
bilyon gigahin sa 3,700 *flood*
control projects, kadaghanan
anomaluso ug *ghost*.

₱1.79 bilyon

pondong gigahin sa *substandard* na *flood control*
project sa **Bunawan River** sa Davao City gikan
2016 hangtud 2024. Adunay mga bahin nga
hangtud karon wala pa gihapon nahuman.

Gikan sa: Kilab Multimedia

1 sa matag 5

Pilipino sa edad 10-64 ay **functionally illiterate**.
Kaya nilang magbasa ug magsulat apan wala kini
magamit sa inadlaw-adlaw.

Gikan sa: Philippine Statistics Authority/Functional Literacy,
Education and Mass Media Survey



15 milyon

Venezuelan ang
nagpalista gikan Agosto
aron subling tukuron ang
Bolivarian Militia sa
tibuok nasud. Pagpakita
kini nga "andam, aktibo ug
armado" ang pwersang
milisya nga panalipdan ang
nasudnong teritoryo sa
Venezuela atubangan sa
pagpanghadlok ug hulgang
pag-atake sa US.

188

namatay ug 135 ang nangawala, kadaghanan sa
Visayas tungod sa grabeng pag-ulan ug
pagbaha nga dala sa **Bagyong Tino**. Anaa sa
127,827 pamilya ang napugos magbakwit gikan
sa ilang mga komunidad.




3,000 ►

mangingisda sa Bais
City ug Manjuyod ang
nadaut ang
panginabuhian tungod
sa pagkayabo sa
kemikal nga *ethanol*
gikan sa **URC Sugar**
and Renewables Group
Distillery Plant
niadtong Oktubre 24;
gihiloan sa kemikal ang
bahandianong
kadagatan sa Tañon
Strait.



14 ka tuig

na ang milabay dihang
gipatay sa paramilitar sa
AFP si **Fr. Pops Tentorio**,
tigpanalipud
sa katungod
sa mga Lumad ug sa
kinaiyahan, niadtong
Oktubre 17, 2011.



Nagkagrabeng pasistang pagpanumpo sa rehimeng Trump sa katawhan sa US

Napulo ka bulan pa lang gikan sa paglingkod pag-usab ni Donald Trump sa gahum, miabot na sa bag-ong ang-ang sa kagrabe ang iyang mga palisiya nga kontra-katawhan ug kontra-demokratiko.

Ginasagad ni Trump ang utlanan sa iyang gahum isip presidente sa US. Nag-asta siyang hari ug diktador nga ginahimo ang unsamang gusto niya nga walay tulubagon. Dayag niyang gidirehe ang iyang administrasyon ngadto sa pasista ug diktaduryang paghari. Dayag usab niyang ginasumpo ang mga kagawasan ug katungod sibil sa katawhan ug giligsan ang kaugalingong mga balaod, proseso, ug institusyon.

Sa pag-astang diktador, gigamit ni Trump ang mga pwersang militar (US Marine ug National Guard) aron paluhuron ang mga *sanctuary state* o mga estadong nag-ila sa katungod sa mga imigrante. Niadtong Setyembre, gideklara ni Trump ang iyang planong gamiton ang militar aron sumpuon ang mga pagsupak sa iyang mga palisiya. Matud niya, walay kalainan ang mga tawong nagsupak sa iyang rehimen sa mga kaway sa US sa laing nasud.

Gihatagan ni Trump ang Immigration and Customs Enforcement (ICE) og “kota” nga 3,000 ka imigrante ang pagadakpon kada adlaw ug gihatagan og awtorisasyon ang paggamit sa pinakabangis ug brutal nga mga pamaagi. Target sa pagbunal, pagpamusil, paglutos, ug deportasyon ang bisan kinsang mosaway kang Trump, ang mga “murag imigrante,” ug mga aktibista.

Mikabat na sa 23 ka indibidwal ang namatay samtang anaa sa kustodiya sa ICE, kadaghanan tungod sa paghikaw sa medikal nga pagtagad. Niabot na sa 515,000 ka indibidwal ang napadeport ug 1.6 ka milyong imigrante ang napugos nga mobiya o kabubut-ong mihawa karong tuiga. Halos 60,000 ang iligal nga gipriso sa mga pasilidad sa ICE diin nahiaguman nila ang pag-abu-

so, pagmaltrato, ug kakulang sa serbisyong medikal.

Hakog sa gahum, pipila ka higayon nang gipadayag ni Trump ang iyang intensyon nga modagan pag-usab isip presidente sa ikatulong termino sa bisan unsang paagi, bisan og supak kini sa konstitusyon sa US. Gipalingkod niya sa gahum ang iyang mga kaalyado ug kaugalingong mga abogado, samtang gikahohan, gilutos, ug gitangtang sa trabaho ang tanang mosupak ug dili mosunod sa iyang kapritso. Pugos niyang gipaluhod sa iyang gusto ang mga kumpanya sa midya, huwes, mga ahensya sa guberno, mga kritiko, ug mga unibersidad.

Gipakusog usab ni Trump ang langyawng interbensyon sa US. Pinangagi sa pagsuplay og mga misayl ug armas sa Zionistang estado sa Israel, aktibo siyang nakigkonsabo sa henosidyo batok sa mga Palestino. Gisulsulan niya ang pag-atake sa Israel sa Iran niadtong Hunyo ug gimando ang paghulog og dagkong mga bomba didto. Gideklara niya ang planong sulungon ang Venezuela aron pugos nga palagputon ang anti-imperyalistang presidente nga si Nicolas Maduro. Padayon ang proxy war sa US batok sa Russia sa Ukraine. Nagkalapad ang interbensyon niini sa Taiwan ug Pilipinas.

Dayag nga ginagamit ni Trump ang iyang posisyon aron labawng maghakop og dugang bahandi. Gikahohan niya og “fake news” ang usa ka kumpanya sa midya, aron lamang makadawat og pipila ka milyong dolyar nga “pakighusay.” Tibuok kalipay niyang gidawat ang usa ka \$400-milyong *jumbo jet* gikan sa guberno sa Qatar isip “donasyon” nga maiyaha pagkahuman sa iyang termino. Niadtong Oktubre, gipugos niya ang iyang tawo sa Department

of Justice nga bayaran siya sa ahensya og \$230 milyon isip kumpensasyon tungod sa giingong paglapas sa iyang katungod sa dihang giimbestigahan siya sa guberno niadtong 2023 ug 2024.

Sa kasamtangan, anaa sa “shutdown” o sirado ang guberno sa US tungod sa dili pagkasinabtanay sa mga kongresista mahitungod sa badyet sa estado alang sa 2026. Walay pagtagad ang rehimen sa mga pag-antus sa mga empleyado sa guberno nga nagtrabaho nga walay sweldo, o sa nagkaubos na nga ayudang pagkaon alang sa mga pamilyang nakadawat lamang og minimum nga suhulan. Hinunua, napuliki siya sa pagtukod og 90,000 metro kwadrado nga *ballroom* (baylehanan) sa White House nga nagkantidad og \$300 milyon, nga plano niyang ipangalan sa iyang kaugalingon.

Sangko na ang kasuko sa katawhang Amerikano sa rehimeng Trump. Bisang mga kaniadto misuporta kaniya nagpakita na og kasuko ug kahiubos sa iyang pagdumala. Wala pa siya miabot og usa ka tuig sa katungdanan apan gusto na siyang papahawaon sa pwesto sa mga Amerikano.

Nagkakusog ang singgit sa katawhang Amerikano: Palagputon si Trump gikan sa trono! Gatusan ka mga protesta na ang gilunsad sa nagkalain-lain bahin sa US aron batikuson ang iyang mga patakaran kontra-katawhan. Nagkahiusa ang mga komunidad aron protektahan ang mga imigrante gikan sa bangis nga pagpanglutos sa ICE.

Mikabat og pito ka milyon ang mitambong sa protestang “No Kings” niadtong Oktubre 18 aron ipakita ang ilang disgusto sa pasista ug kontra-katawhang guberno ni Trump. Kini ang pinakadakung protesta sa nasud karong tuiga. Kini usab ang ikatulo nga nasudnong

Sundi sa panid 9

Kahimtang sa mga migranteng Pilipino, nagkagrabe

Sa milabayng mga semana, sunud-sunod ang mga taho sa makaluluoy nga kahimtang sa mga migranteng Pilipino nga bangis nga gilutos, giabuso, gideport, ug gihikawan sa hustisya ug mga katungod. Sa nagkagrabeng krisis sa ekonomiya sa kalibutan, sila ang gipasanginlan sa pag-ilog sa trabaho, sa implasyon, ug sa pagtaas sa mga krimen sa mga nasud diin sila nahimutang.

Sa Canada, Japan, ug Korea, labaw pang migrabe ang paglutos sa mga imigrante tungod sa mga palisiyang kontra-migrante ug nagkagrabeng kultura sa rasismo ug xenophobia.

Sa Taiwan, mikabat sa 169 ang narekord nga biktima sa pagpanglugos sa han-ay sa mga migranteng mamumu sa nasud sa miaging tuig. 22 sa mga biktima mga Pilipino. Kadaghanan sa mga biktima nagatrabaho sa mga pabrika ug isip mga katabang sa balay.

Sa US, 143 ka Pilipinong marino ang gideport gikan sa miaging tuig. Niadtong Setyembre, gikansela sa embahada sa US sa Pilipinas ang mga aprobadong US visa sa mga marino nga pagawas pa lang unta sa nasud. Sama sa mga gideport nga marino, gigamit sa embahada ang pasangil nga kasong *child pornography* bisan walay ebidensya o imbestigasyong gihimo.

Sa Thailand, kapin sa usa ka gatus ka Pilipinong biktima sa "scam-hub trafficking" ang nakaabot na sa utlanan sa Myanmar ug nanginahanglan og hinanaling tabang ug aksyon.

Sa Kuwait, hilaw nga hustisya ang nakuha sa pamilya ni Dafnie Nacalaban, usa ka katabang sa balay nga gipatay sa iyang amo. Anaa lamang sa 14 ka tuig nga pagkabilanggo ang gipahamtang sa maong amo, nga ubos kaayo nga sentensya alang sa iyang krimen.

Sa The Netherlands, gihikaw usab ang hustisya sa 11 ka migranteng mamumu sa Pilipino sa desisyon sa Public Prosecution Service nga ibasura ang ilang reklamong *human trafficking* batok sa Saints and Stars Gym nga nakabase sa Amsterdam.

Ang makaluluoy nga kahimtang sa mga migrante direktang resulta sa *labor export policy* sa reaksyunaryong gubyernong Pilipino. Gisupportahan niini nga mga palisiya ang migrasyon sa mga mamumu sa Pilipino imbis nga sulbaron ang problema sa kawalay trabaho, makabuhi suhulan, ug disentang katilingbangong serbisyo.

AB

Gikan sa panid 8 protesta.

Aktibong misalmot ang mga demokratikong organisasyon sa mga Pilipino sa mga protesta sa US. Naglunsad sila og mga kampanya, ubos sa Tanggol Migrante Movement, aron ipanawagan ang paglingkawas, paghatag og proteksyon ug serbisyo sa mga iligal nga giprisong mga migranteng Pilipino, ug singilon ang gubyernong Marcos sa tulubagon niining protektahan ang mga Pilipino sa US.

Sa Nobyembre 8, sa unang tuig sa pagkadaug sa eleksyon ni Trump, gikatakdang maglunsad og protesta ang nagkalainlaing tsapter sa mga organisasyon sa US ubos sa pagpangulo sa Bagong Alyansang Makabayan.

AB

North Caloocan, gi-atake sa 12th CMO ug NTF-Elcac

Usa ka bulan na nga gitugaw sa 12th Civil Military Operation (CMO) Battalion ug NTF-Elcac ang mga residente sa North Caloocan. Sagunson ang ilang gibuhat nga *Red-tagging*, pagpaniktik, ug pagpamig-ot ilabina sa mga myembro sa progresibong organisasyon sa mga barangay.

Una nga gideploy ang batalyon sa Barangay 181-182, Pangarap Village niadtong Oktubre 3 sa takuban sa Community Support Program. Plano sa militar nga sumpuon ang pagsukol sa katawhan nga nag-atubang sa hulga sa demolisyon gikan sa pamilyang Araneta.

Nagsugod og kampo ang 12th CMO sa pagpanguna ni 2nd Lt. Julie San Jose sa likod sa covered court sa Barangay 175, Camarin niadtong Oktubre 6, sa takuban sa kalinaw ug kalig-on. Dinhi na nagpokus ang operasyon sa batalyon. Paglabay sa pipila ka adlaw, gisakop sa ilang operasyon ang Barangay 187-188 Tala.

Niadtong Oktubre 28, gisulod ang upisina sa Gabriela-Caloocan sa mga nagpailang mga pulis. Nagdeklara silang adunay dalang warrant of arrest apan walay gipakita nga dokumento. Sa samang adlaw, gipatawag sa militar ug kapitan sa barangay ang mga myembro sa Gabriela-Matarik sa barangay hall diin gipasanginlan sila nga mga rekruter sa rebolusyonaryong organisasyon.

Gigamit usab sa NTF-Elcac ang asembleya sa barangay niadtong Oktubre 18 aron ipakaylap ang sayop nga impormasyon ug i-red-tag ang mga organisasyong masa. Dayag ang pagpaniktik sa militar sa mga protesta batok sa korapsyon sa mga progresibong grupo, nga gilunsad sa Camarin Kiko Palengke ug sa UCC Congressional Village niadtong Oktubre 10 ug 17.

Nabalaka ang Defend Caloocan nga usbon sa militar ang pagpugos sa mga myembro sa progresibong grupo ug mga residente nga "magbalik-loob" sama sa gibuhat sa 12th CMO sa United Vendors Alliance niadtong 2024.

Ang militarisasyon nga nahitabo sa North Caloocan nahiuyon sa gambalay sa National Action Plan for Unity, Peace and Development. Sumala sa programang Capacitating Urban Communities for Peace and Development nga gipangulohan sa Department of the Interior and Local Government, gipailalum ang mga komunidad sa kasyudaran nga adunay natukod nga makinasudnong organisasyon sa mga operasyong sarbeylans, pagpamig-ot, ug pagpanumpo sa PNP ug AFP.

AB

**Interbensyon sa NTF-Elcac sa mga Unibersidad,
ginapakyas sa mga estudyante**

MATNGON UG MILITANTENG gipakyas sa mga kabatan-onan ug estudyante ang sulayng interbensyon sa National Task Force-Elcac ug mga bayarang traydor sa rebolusyonaryong kalihukan sa mga unibersidad sa takuban sa mga "porum" ug "akademikong diskusyon."

Sa UP Mindanao, nag-walkout ang mga lider-estudyante sa kampus atol sa porum sa TAGBO 2025 niadtong Oktubre 26 tungod sa pagsal-ot ug pagpamulong ni Arian Ramos, usa ka traydor sa rebolusyonaryong kalihukan ug usa sa lunod-patay nga tigdepensa sa NTF-Elcac ug Armed Forces of the Philippines. Si Ramos, uban sa napulo ka sama niyang traydor, mao ang nanguna sa *Red-tagging* sa lehitimong mga organisasyong estudyante ug ilang mga lider. Nagdala pa si Ramos og "bodyguard" nga ahenteng paniktik nga nagbunga og grabeng kabalaka sa mga estudyante.

Gipasidunggan sa Council of Student Leaders sa unibersidad ang gibuhat nga pag-walkout sa mga estudyante. Gikundena usab nila ang administrasyon sa UP Mindanao nga mitugot niining mahitabo nga matud pa nila dili usa ka "isolated" nga insidente. Dugang nila, kini salamin sa mga "kahuyangan sa institusyon" nga kaniadto pa nila gikundena. Kapin 30 ka organisasyong pang-estudyante sa UP Mindanao ang mipirma sa pamahayag sa CSL.

Sa UST, napaatras sa kolektibong pagkundena sa mga estudyante ang partisipasyon unta sa NTF-Elcac sa porum nga "Preventing Terror Grooming: The Philippine Experience." Sumala sa mga progresibong grupo sa kampus, ang pag-imbatar sa ahensya usa ka pagyatak sa dungog sa unibersidad ug sa mga Tomasining nagdepensa sa kamatuuran.

Niadtong Nobyembre 5, naglunsad og protesta ang mga estudyante sa kampus isip pagrehistro sa ilang pagbatikos sa NTF-Elcac ug sa porum. Bisan napaatras ang NTF-Elcac, nagsilbi giha-pon isip dinapit ug tigpamaba sa porum niadtong Nobyembre 6 ang representante sa National Security Council ug ang traydor nga si Arian Ramos. Nakigdebate kanila ug mibarog batok sa *Red-tagging* ang usa ka aktibista sa UST.

**Isla sa Leyte, gigun-ob
sa militarisasyon sa 802nd IB**

GIKAN ENERO HANGTUD Oktubre karong tuiga, dili momenos sa 99 ka barangay ug 15 ka munisipalidad sa isla sa Leyte ang gigun-ob sa mga operasyong kombatan sa 802nd IB. Kauban niini sa operasyon ang 14th IB, 93rd IB, 8th CMO Battalion, ug pulis.

Sa prubinsya sa Leyte, 10 ka lungsod ang nasakop sa operasyong kombatan, lakip ang Baybay City, nga niadtong Pebrero giklasipikar nga Stable Internal Peace and Security Condition (SIPSC) aron ipagawas nga wala nay pwersa ang hukbong bayan sa maong lugar. Niadtong Setyembre, gipailalum sa hamlet ang Barangay Caraye sa Javier, ug mga barangay Igang ug Hilapnitan sa Baybay City.

Sa Southern Leyte, lima ka lungsod ang militarizado, lakip ang Saint Bernard nga giklasipikar usab nga SIPSC niadtong Marso.

Sumala sa mga residente, kada anaa ang militar sa baryo, padayon ang ilang pagpanghadlok. Pugos silang ginapapauli og sayo gikan sa ilang umahan. Gihulga sila nga dakpon ug prisuhon kung maghatag og tabang sa hukbo. Gipasurrender usab sa militar ang mga pusil nga ginagamit sa mga residente sa pagpangayam.

Usa sa pinakabag-o nga krimen sa militar sa isla mao ang pagdakop sa mag-uuma nga si "Loloy" nga taga Barangay Masuganao, Mahaplag, Leyte. Gipasanginlan siyang sakop sa Bagong Hukbong Bayan.

Paglapas sa tawhanong katungod sa Panay ug Negros, nagpadayon

Padayon nga ginatarget sa militar ug pulis ang mga mag-uuma sa isla sa Panay ug Negros sa milabayng mga semana aron hadlukon ang mga komunidad ug magsabwang og terorismo.

Sa Negros Occidental, gipatay sa militar ang babayeng mag-uuma nga si Joan Escudero niadtong gabii sa Nobyembre 3. Gisulod sa mga ahente sa militar ang iyang balay ug gidul-itan pagpusil.

Sa Bago City, padayon ang pagpamig-ot sa pulis sa Negros Occidental District Jail-Male Dormitory sa mga bilanggong pulitikal ug lider nga mibatok sa pagpangabuso sa napalagpot apan nakabalik ra sa poder nga si warden Maj. Crisysrel Awe. Arbitrar-

yong gibartolina si Lorenzo Perolino sukad niadtong hapon sa Oktubre 26.

Sa Iloilo City, gidakop sa mga pulis ang 67 anyos nga si "Mayok" sa Barangay Buntatala, Jaro niadtong Nobyembre 3. Gipasakahan siya og patung-patung nga mga kasong kriminal ug gipasanginlang taas nga upisyal sa rebolusyonaryong kalihukan. Adunay patung sa iyang ulo nga ₱2.55 milyon.

Gidakop sa mga pulis ug militar ang organisador sa mga mag-uuma

ug katutubo nga si Marlene Espiritu samtang nagbyahe sa Mabalacat City, Pampanga niadtong Nobyembre 1. Gipasanginlan siyang taas nga upisyal sa BHB sa Central Luzon ug gisang-atan og lima ka kasong kriminal.

Sa Davao City, gipahamtangan og 30 ka adlaw nga suspensyon sa Ombudsman niadtong Oktubre 20 ang kapitan sa Barangay Bucana 76-A nga si Robert Olanolan tungod sa iyang pagsupak sa demolisyon sa Kabacan ug Times Beach sukad pa Enero 2024. Nag-atubang si Olanolan og reklamong *grave abuse* nga gisang-at sa DMCI nga nagplanong magtukod og negosyo sa maong lugar.